

Waraga më ariö na Paulo öcöö both jö Korinti 1 Jö Korinti Köp na ut i waraga ni

Waraga më ariö na Paulo öcöö both jö Korinti, ëcöö i karë n'onwongo wat mërë kî jö n'oye Kiricito na tye i Korinti öbal rwök. Jö mökö kî kin jö n'oye Kiricito onwongo ötwakö gîni köp na rac kanyalër i kom Paulo, ëntö ën onyutho bothgî köp më rîbërë kanya acël ëka ën thon onyutho yom cwiny mërë i karë na köp ni ötimërë.

Köp mërë më acël kî i waraga ni, Paulo önywakö köp më wat mërë kî jö n'oye Kiricito na tye i Korinti, nakun kobo bothgî pîngö ën ëgamö kî gero më yanyö ëka kî jëm na tye i kin jö n'oye Kiricito. Paulo onyutho yom cwiny mërë ni twak na ën ëtwakö kî gero okelo ngut ëka rîbërë. Cë ën ökwaö jö n'oye Kiricito më mïö köny both ëcan n'obedo gîni Ekiricito na tye i Yudea. I cura më ajiki, Paulo ocung na tæk i kom tic mërë na calö akwëna nakun jükö jö mökö na nönök na tye i Korinti n'onwongo gîni öyübërë nakun kobo gîni ni gîni ënë ebedo ëkwëna n'atîr, nakun dotho gîni Paulo ni obedo akwëna na twot.

Moth n'öya kî both Paulo

¹ Waraga ni öya kî both Paulo, n'ëyëro kî miti k'Obanga më bedo akwëna ka Kiricito Yecu ëka kî both ömîn onu Timoteo.

Both jö k'Obanga n'oye Kiricito na tye i Korinti, kanya açel ki jö k'Obanga na leng kibëc na tye i Akaya kibëc:

² Ëk Obanga Apap onu ëka Rwoth Yecu Kiricito ömiiwu kica ëka kuc.

Obanga na kweo cwinywa kibëc

³ Pwöc obed both Obanga Apap ka Rwoth onu Yecu Kiricito, Apap n'obedo akica ëka Obanga na kweo cwiny jö kibëc.

⁴ Ën kweo cwinywa ki i canwa kibëc, ëk wan thon ekwe cwiny jö na tye ki can na papath ki kweo cwiny na wan kikomwa enwongo ki both Obanga.

⁵ Pi kite na can na Kiricito ödangö opodho i komwa na thwönë, kömanön thon pi Kiricito wan thon ekweo cwinywa rwök.

⁶ Ka wan ëdangö can, manön müö ekweo cwinywu ëka inwongo unu larë. Ka ekweo cwinywa, manön thon müö ekweo cwinywu, müö un icakö nwongo tükö më dangö kit can na wan thon ëdangö.

⁷ Wan etye ki gen na tük pi un, piën wan engeo ni ka un inywakö unu ködwa can na wan ëdangö, un thon ebino kweo cwinywu kite n'ekweo ki cwinywa.

⁸ Utmegowa, wan ëmitö ni inge unu can na wan ëdangö i lobo Acia. Pökö ödiiöwa rwök na wan ba dök ërömö dangö, ömüö wan ba dök ebedo ki gen mörö më kwö.

⁹ Adyer, wan onwongo engeo ki i cwinywa ni dong etyeko ngölö niwa köp më thöö. Ëntö man ötimëre ëk kür eketh gen i komwa kënwa ëntö both Obanga na cero jö n'öthöö.

¹⁰ Ën ölaröwa ki i can na rac më thöo, ëka ën dökï bino laröwa. Wan dong eketho genwa i kome ni ën bino laröwa dökï.

¹¹ Myero iribërë unu ködwa ilëga, ëk ömii jö na pol öpwö Obanga pirwa pi gin na bër n'ëtimo i komwa pi lëga ka jö na pol.

Gin n'ömio woth ka Paulo ögalërë

¹² Gin na wan ewakërë pirë ën ene, wan engeo ki i cwinywa adyer ni wan ëkwö na bër i lobo ni, ëka rwök mërë wan ëkwö kanya acël kodwu abonge bal mörö na cwinywa leng kit n'Obanga ömitö ködë. Pathi pi ryëkö ka dhanö ëntö pi kica k'Obanga.

¹³ Wan ba ecöö bothwu gin mörö na un ba irömö kwanö onyo niang ië. Ageno ni ibino unu niang na bër,

¹⁴ kite na calö dong iniang unu na nönök ni i ninö na Rwothwa Yecu bino dwogo, un ibino wakërë unu pirwa kite na wan thon ebino wakërë pirwu.

¹⁵ Piën an onwongo aniang na bër, ömii ayübö ni myero acak limöwu ëk inwong unu gum wang kirio.

¹⁶ An ayübö më wok limöwu ka acidhö yo Macedonia ëka dökï ka adwogo ki Macedonia, ëk ikönya unu i wothna yo Yudea.

¹⁷ I karë na an ayübö kömanön, onwongo ba abedo lölökö köpna. Ba ayübö calö dhanö mörö na kobo ni, “Eyo” onyo “Pe” awang acël.

¹⁸ Ëntö kite n'Obanga obedo ngat na genere, köp n'onwongo wan ekobo bothwu ba obedo “Eyo” ëka “Pe.”

¹⁹ Piën Yecu Kiricito, Wod k'Obanga, n'onwongo wan ki Cilibwano ëka Timoteo ëtitö bothwu ni ba

obedo ngat na kobo nī, “Eyo” ëka “Pe,” ëntö i ën, wan enwongo “Eyo” këkën.

²⁰ Piën gin n'Obanga öcïkö nī ëtimö kibëc ocobere i kome, pī manön wan ekobo nī, “Amën” i Yecu Kiricito pī miö dheo both Obanga.

²¹ Obanga ënë ömiö wan ecung na tøk kanya acël kodwu i Kiricito, ëka ën owirowa.

²² Ën dong ömwönö anyuth mërë i komwa, ëka oketho Tipo mërë i cwinywa më moko nī ën ebino miö gin na kibëc na ën öcïkö.

²³ An acwodo Obanga më bedo caden-na nakun akobo kī cwinya kibëc nī an ba abino adwogo i Korinti, piën onwongo amitö timö niwu kica.

²⁴ Pathi nī wan etye kī twërö i kom yeewu, ëntö wan etio kodwu kanya acël ëk un ibed kī yom cwiny, piën un icung na tøk i kom yee.

2

¹ Ëntö kī kubotha onwongo athamö nī dwogona myero kür okel niwu cwer cwiny nököënë.

² Ka acwero cwinywu, cë nga na döki bino yomo cwinya? Pathi dhanö na an acwero cwinye?

³ Manön ënë ömiö an acöö waraga nön bothwu, ëk ka abino, jö na myero oyom cwinya kür ömia gini cwer cwiny, piën onwongo ageno nī yom cwinya ënë yom cwiny na mewu.

⁴ An onwongo acöö niwu waraga kī thwön kumo ëka kī cwer cwiny na pii wanga cwer, pathi pī cwero cwinywu ëntö ëk ömii inge unu mar na thwönë na an aute ködë i komwu.

Timö kica both Abal

⁵ Ka ngat mörö okelo cwer cwiny, nwongo ba ocwero cwinya an këna, ëntö nwongo ocwero

cwinywu kibëc. Akobo nî kömanön piën ba amitö nî adii ën rwök.

⁶ Koth dhanö n'obedo nî kömanön, pwod na jö na pol oketho i kome nwongo örömö ën.

⁷ Kobedini, myero itim unu kica ninë ëka ikwee unu cwinye, ëk ömii cwer cwiny na dit kür obuu ën ökö.

⁸ Pi manön akwaöwu nî myero inyuth unu mar na un itye ködë i kome.

⁹ Man ënë gin n'ömio acöö waraga më tëmöwu ëk anën ka iwinya unu i yodhi kibëc.

¹⁰ Ka ngat mörö na un dong itimö kica ninë, an thon atimö kica ninë, ëka gin mörö na an dong atimö kica ië, ka mörö tye, nwongo atimö kica i nyim Kiricito pirwu,

¹¹ ëk Catan kür ölööwa kî ryëkö mërë. Piën wan dong engeo thama mërë.

Gin n'ömio Paulo cwinye ba obedo na yom i Teroa

¹² I karë na an athuno i Teroa më titö Emuth na Bër ka Kiricito, anwongo nî Rwoth dong öyabö yoo nina.

¹³ Entö cwinya ba obedo na yom piën ba anwongo ömëra Tito kunön. Cë amotho jö n'oye na tye kunön ëka apoth yo Macedonia.

¹⁴ Entö pwöc obed both Obanga, na karë kibëc tëlöwa i dore më nyutho löc ka Kiricito, dökî tio ködwa ëk Kiricito ongere na calö gin na kur na ngwece dung i kabedo kibëc.

¹⁵ Piën wan ebedo gin na ngwece kur ka Kiricito both Obanga, na dung na mit both jö na tye ka larë ëka both jö na tye ka rwenyo.

¹⁶ Both jö na tye ka rwenyo ngwecewa obedo gin n'öthöo na kelo thöo, ëntö kî both jö na tye ka larë ngwecewa obedo gin na kwö na kelo kwö. Ëka nga na twërö tic ni?

¹⁷ Wan ba ëcal kî jö na pol nökenë na rubo gîni köp k'Obanga më nwongo magoba. Ëntö i Kiricito, wan ëtwak na cwinywa leng i nyim Obanga na calö jö n'Obanga ooro.

3

Etic më cîkërë na nyen

¹ Wan dökî ëcakö më pakërë kënwa? Onyo un ïmitö nî wan ebin kî waraga më nyuthere bothwu calö jö nökenë onyo waraga na un ïcöö?

² Un kikomwu ïcal kî waragawa më nyuthere n'ëcöö i cwinywa, na ngere ëka jö kibëc kwanö.

³ Un dong inyutho nî ibedo unu waraga n'öya kî both Kiricito, na wan ekelo. Waraga nî ba ëcöö kî kalam ëka ingki, ëntö ëcöö kî Tipo k'Obanga na kwö, ba ëcöö i kidi ëntö ëcöö i cwiny dhanö.

⁴ Gin n'ömiö akobo kömanön piën wan ecung na tük i nyim Obanga i Kiricito.

⁵ Wan kî komwa ba ërömö kobo nî gin mörö öya kî bothwa, ëntö tüköwa kibëc öya kî both Obanga.

⁶ Ën ömiöwa ërömö bedo etic më cîkërë na nyen, pathî më cîk n'ëcöö acöa ëntö më Tipo, piën cîk n'ëcöö acöa kelo thöo, ëntö Tipo kelo kwö.

Dheo më Cîkërë na Nyen

⁷ Cîk na yam ëcöö kî nyukuta i kom kidi n'apada na tic mërë kelo thöo, onwongo obino kî dheo. Ömiö nënö wang Muca obino ölöo jö Icarael ökö pi

ryëny ka terinyime, na dheo na ryëny nön obino orwenyo ökö.

⁸ Cë dong tic ka Tipo ba bino bedo kî dheo na löö?

⁹ Cë ka tic na mïö köp löö dhanö tye kî dheo, kara tic na kelo kwanö dhanö nî kite atîr dheo mërë ba bino löönö manön ökö?

¹⁰ Adyer gin na yam tye kî dheo dong ödökö gin na dheo mërë ope, pî dheo nökenë ca na dong löö ën rwök.

¹¹ Ëka ka gin n'onwongo orwenyo ökö obino kî dheo, cë gin na ruu myero obed kî dheo na löö!

¹² Pî manön, wan etye kî koth gen ni, ënë ömïö wan ëtwak kî tæk cwiny.

¹³ Wan ba ëcal kî Muca na yam oumo terinyime kî böngü ëk jö Icarael kür önën gîni kit na tar na ryëny rwenyo ködë kî i terinyime.

¹⁴ Ëntö thamagî onwongo oumere ökö, naka thon tin thamagî pod oumere ka ëkwanö cîkërë na cön. Gin më um nön bara ëkwanyö, piën twërö kwanyërë ökö pî yee i Kiricito kékën.

¹⁵ Naka tin ka ëkwanö cîk ka Muca, gin më um nön pod umo thamagî.

¹⁶ Ëntö ka dhanö mörö ölökerë both Rwoth, gin më um nön ëkwanyö ökö.

¹⁷ Kobedini, Rwoth ënë Tipo, ëka kanya Tipo ka Rwoth tye ië, kuc thon tye ië.

¹⁸ Ëka wan kibëc na dong ëkwanyö gin më um ökö kî i terinyimwa, dong etye na calö dheo ka Rwoth, na mïö ëlökerë ëdökö calö ën, nakun dheo mërë mëdërë amëda, na bino kî both Rwoth, na ënë Tipo.

Tar më Emuth na Bër

¹ Pī manön, wan na dong ëmiöwa tic ni pī kīca k'Obanga, cwinywa ba bino dök cen.

² Ëntö wan dong ëkwërö kit na reco kībēc n'ëkanö ëka më lewic. Ëka dökī ëkwërö tic më bwöl ökö ëka kī dwanyö köp k'Obanga, ëntö wan ëtwakö köp adyer i nyim Obanga, ëka jö kībēc na genere ngeo.

³ Ka cë Emuth na Bër na wan ekelo oumere ökö, nwongo oumere kī both jö na tye ka rwenyo kēkēn.

⁴ Gīn jö na ba yee nonu, obanga më lobo ni dong oumo thamagi ökö ëk kür önēn gīnī tar më Emuth na Bër i kom dheo ka Kiricito, na ënē cal k'Obanga kikome.

⁵ Wan ba ëtītö köp i komwa kēnwa, ëntö i kom Yecu Kiricito n'obedo Rwoth, ëka wan kikomwa ebeto eticwu pī Yecu.

⁶ Pīēn Obanga yam okobo nī, “Wëk tar öryēny nakun yaa kī i cöl pīny,” man ënē Obanga acēl nōn n'ömīö tar mērē öryēny i cwinywa më miöwa tar më ngec i kom dheo k'Obanga na ryēny i wang Kiricito.

Lönyö n'ëkanö i tabö

⁷ Ëntö wan etye kī lönyö ni na tye i tabö n'ecweo kī lobo, më nyutho nī tēkö na thwönē yaa kī both Obanga, ëntö ba yaa kī bothwa.

⁸ Ëdiöwa i yodhi kībēc, ëntö ba ërīdöwa rwök. Thamawa ocung ökö, ëntö genwa ba öbal.

⁹ Eyelowa, ëntö Obanga ba öwēköwa ata, ëtēöwa pīny, ëntö ba ëthöö.

¹⁰ Karē kībēc wan ëyēö thöö ka Yecu i komwa, ëk kwö ka Yecu thon onen i komwa.

¹¹ Piën karë kibëc wan n'ekwö emirë më thöo pī Yecu, ëk kwö mërë onen i komwa na thöo ökö.

¹² Man dong nyutho nī thöo tye ka tic i komwa, ëntö kwö tye ka tic i komwu.

¹³ Wan etye kī koth tipo nön ëk yee na yam ecöö nī, “An ayee, ënë ömïö atwak.” Wan thon eyee, ënë ömïö wan ëtwak.

¹⁴ Wan engeo nī ngat n'ocero Rwoth Yecu bino cerowa thon kite n'ocero kī Yecu, ëka ën bino kelowa i nyime kanya acël kodwu.

¹⁵ Jami ni kibëc ötimërë pīrwu, ëk kīca k'Obanga ömëdërë both jö na pol, ëk gīn thon ömëdërë kī pwöc rwök më miö Obanga dheo.

Kwö më yee

¹⁶ Pī manön, cwinywa ba tye ka dök cen, kadī del komwa ni tye ka bal, ëntö kwö më iwa tye ka rök nīnö kī nīnö.

¹⁷ Piën can n'eyelowa ködë yot, tye pī karë mörö na nönök, ëka tye ka yübö nīwa dheo na thwönë na ba thum ëka thwönë na löö.

¹⁸ Wan ba ecikö wangwa më nēnö gīn na nen, ëntö më nēnö gīn na ba nen. Gīn na nen bedo pī karë na nönök kēkēn, ëntö gīn na ba nen bedo naka naka.

5

Öt na ba ëgërö kī cīng

¹ Kobedini onu engeo nī ka kom onu më lobo ni n'ebedo ië ëbalö ökö, etye kī gedo n'öya kī both Obanga na ba ëgërö kī cīng, öt na bedo na twal i wi polo.

² Adyer onu ecür acūra i kom onu më lobo ni piën onu etye ki miti ni ëk eruk onu ki kom më polo,

³ piën ka eruko onu, ba ebino nwongo onu etye kotula.

⁴ Piën ka wan pod etye i kom më lobo ni, ecür acūra ki cwer cwiny n'önüowa, pathi ni wan ba ëmitö ni ebed na ba erukowa, ëntö wan ëmitö ni erukwa ki kom na nyen, ëk gin na kwö ömwöny gin n'öthöö ökö.

⁵ Ngat n'öyüböwa pi köp ni ënë Obanga, ëka thon ömiöwa Tipo mërë na calö gin na moko ni ën ebino cobo gin n'ëcökö.

⁶ Pi manön i karë kibëc wan ecung na tæk ëka thon engeo ni ka wan ëkwö i komwa ni nwongo ebedo na bor ki both Rwoth,

⁷ piën kwöwa cung i kom yee, pathi gin n'ënënö ki wang.

⁸ Wan ecung na tæk, nakun ëthamö ni thwara ëwëk komwa ökö, ëk ebed i pacö kanya acël ki Rwoth.

⁹ Dong kadï bed etye i kom kany onyo kunön, wan eketho cwinywa më bedo jö na yomo cwiny Rwoth.

¹⁰ Piën onu kibëc myero ecung i nyim then më ngölö-köp ka Kiricito ëk ngat acëlacël onwong gin n'opore na ën ötimö i karë n'onwongo ën pod tye i kom, ka bër onyo rac.

Tic më dwökö dhanö both Obanga

¹¹ Pi manön, wan kibëc engeo ni Rwoth myero elwor, wan ëtëmö më ywanö thama ka jö nököënë. Ëntö kitewa ngere both Obanga, ëka thon ageno ni ngere i ngec na tye i cwinywu na nyutho niwu bal.

¹² Wan ba dōki etye ka pakērē kēnwa bothwu, ěntō etye ka mīōwu karē mē wakērē ĩ komwa, ěk ōmīīwu ĩgam unu kōp ka jō na wakērē ĩ kom gin na nen kī yōkō, ěka pathī pī gin na tye ĩ cwiny jō.

¹³ Ka wan ědōkō jō n'opo, nwongo wan epo pī Obanga, ěntō ka wiwa tye ka tic na bē, manōn obedo mē kōnyōwu.

¹⁴ Pīen mar ka Kiricito tye ka lōōnō kwōwa, pīen wan dong ěngölō kōp kōman nī ngat acēl ōthōō pī jō kībēc, manōn dong ōmīō jō kībēc ōthōō gīnī.

¹⁵ Ěn yam ōthōō pī jō kībēc, ěk jō na kwō kūr dōki obed na kwō pīrgī kēn-gī, ěntō obed gīnī kī kwō pī ngat na yam ōthōō ěka ocer pīrgī.

¹⁶ Dong cakērē tin mē cīdhō kōdē anyim wan ba dōki ěnēnō dhanō mōrō ĩ kite mē lobo, kadī bed yam wan engeo Kiricito ĩ kite mē lobo, wan ba dōki engeo ěn ĩ kite nōn.

¹⁷ Pī manōn ka ngat mōrō tye ĩ Kiricito, ěn dōkō cwec na nyen, gin na cōn nwongo orwenyo ōkō, gin na nyen ěnē dong oleo kakarē.

¹⁸ Man kībēc obedo tic n'ōya kī both Obanga, n'ōdwōkōwa bothe pī Kiricito ěka ōmīōwa tic mē dwōkō jīi bothe,

¹⁹ Obanga onwongo tye ka dwōkō jō na tye ĩ lobo yo bothe ĩ Kiricito nakun ba ōkwanō balgī ĩ komgī. Ěka ěn ōmīōwa kōp mē dwōkō jīi bothe.

²⁰ Pī manōn, wan dong ědōkō ěwang Kiricito, Obanga kwaōwu kī dwōnwa. Wan thon ěbakō dhōwa bothwu nakaka Kiricito nī ĩmīi unu Obanga ōdwōkwu bothe.

²¹ Obanga ōmīō ngat n'onwongo ba obedo abal ōdōkō abal pī onu, ěk ĩ Kiricito onu ěnywak kite atīr

k'Obanga.

6

¹ İ ticwa kanya acël k'Obanga, wan ëkwaöwu nĩ kür iwëk unu kica mërë öbal nono.

² Piën ën okobo nĩ,
“Yam awinyi i karë më tımö dhanö na bër,
ëka i karë më larë abino akonyi.”

Winy unu, tin ënë caa më tımö dhanö na bër. Tin ënë nınö më larë.

³ Wan ba eketho orii i yoo ka ngat mörö, ëk kür enwong bal mörö i ticwa.

⁴ Ëntö na calö etic k'Obanga, wan enyutho bërwa kënwa i kite na papath: ki dangö pëkö na tək, i ayela na pol, i can, ëka ki kwö na tək n'ödïowa,

⁵ epwodowa, etweowa i buc, ëcüpö lwak i komwa, etio tic na tək, ebedo abonge nınö ëka cem oremowa.

⁶ Wan enyutho nĩ wan etic k'Obanga pĩ kitewa na leng, pĩ ngec na wan etye ködë, pĩ diınö cwinywa ëka kicawa, pĩ Tipo Naleng, ëka pĩ mar na wan etye ködë na twodo ope ië,

⁷ i twakwa n'atır, ëka pĩ təkö k'Obanga, wan ëmakö jami lwëny më kite atır i cingwa kucem ëka kucam.

⁸ Gın öwöröwa, ëka ba öwöröwa gini thon, ëyanyöwa ëka ëpaköwa. Eterowa na calö etwodo, nakun wan ëtwakö köp adyer,

⁹ eterowa na calö jö na ba engeo, ëntö engeowa na bër, na calö jö n'öthöo ëntö ëkwö, na calö jö n'epwodogı ëntö ba enekowa,

¹⁰ na calö jö na kumo ëntö cwinywa nwongo pod tye na yom, na calö ëcan ëntö ëmıö jö na pol ödökö

ëlönyö, na calö jö n'ope kî gin mörö ëntö etye kî jami kibëc.

¹¹ Un jö Korinti, wan dong ëtwak kodwu kanyalër, ëka ëyabö cwinywa na lac bothwu.

¹² Wan ba eumo cwinywa kî bothwu, ëntö un ënë iumo unu cwinywu kî bothwa.

¹³ An atwak kodwu na calö un ëthïnöna, yab unu thon cwinywu na lac.

Öt k'Obanga na kwö

¹⁴ Kür iribërë unu kî jö na ba oyee. Kite atir twërö bedo kanya acël kî kite na ba tye atir nïngö? Onyo tar twërö ribërë kî cöl piny kanya acël nïngö?

¹⁵ Thama ka Kiricito twërö rwatërë kî më ka Belial nïngö? Onyo ngö na dhanö n'oye Kiricito twërö nywakö kî dhanö na ba oye Kiricito?

¹⁶ Öt k'Obanga twërö ribërë kî cal jwogi nïngö? Pïen wan ënë ebedo öt k'Obanga na kwö, na calö Obanga okobo nï, “An abino bedo ködgi, ëka abino woth i kin-gi, abino bedo Obangagi, ëka gin thon bino bedo jöga.”

¹⁷ “Pï manön dong yaa unu ökö kî bothgi, ëka ipokere unu, man köp na Rwoth okobo. Kür igud unu gin na ba leng, ëka abino gamöwu.”

¹⁸ “An abino bedo apapwu, ëka un ibino bedo awopena ëka anyirana, man köp na Rwoth Won Twër Kibëc okobo.”

7

¹ Nyikoneina më amara, kite na wan dong etye kî cîkërë ni, myero onu dong ëlönyërë ökö kî kom

gin na kibëc na lino kom onyo tipo, nakun elworo Obanga, ëk ebed jö na leng kikokome.

Yom cwiny ka Paulo pï ngut ka jö Korinti

² Yab unu cwinywu bothwa. Wan ba ëtimö gin mörö na rac both ngat mörö, wan ba ëbwölö ngat mörö ëka wan thon ba ebuo ngat mörö.

³ An ba akobo köp ni ëk köp ölöwu, pïen akobo bothwu cön nï un pïrwu tøk bothwa rwök, më kwö kanya acël onyo më thöö kanya acël kodwu.

⁴ Atye kigen rwök i komwu, awakara thon pïrwu. Cwinya okwe na bë, ëka apong kï yom cwiny i canwa kibëc.

⁵ I karë na wan ethuno i Macedonia wan ba enwongo karë më yweo, can onwongo ögüröwa tungi kï tungi, lwëny i kin dhanö ëka lworö n'onwongo tye i cwinywa.

⁶ Ëntö Obanga, na kweo cwiny jö na cwinygi ötür, okweo cwinywa pï bino ka Tito.

⁷ Pathï pï bino mërë këkën, ëntö thon pï kite na un icükö unu kï cwinye. Ën okobo bothwa miti na un itye ködë më nënöna, cwer cwiny na un itye ködë, kit cwiny na un ibedo ködë i koma, ëk yom cwinya ömëdërë amëda.

⁸ Kadï bed waragana ocwero cwinywu, an ba angut më cöönö, kadï bed nï angut aniang nï waraga nön ocwero cwinywu pï karë mörö na nönök.

⁹ Kobedi dong an cwinya yom, pathï nï acwero cwinywu, ëntö pïen cwer cwinywu ömïö un ingut. Cwer cwinywu nön onwongo öya kï both Obanga, ëk ömïïwu kür inwong unu can mörö pïrwa.

¹⁰ Piën cwer cwiny n'Obanga miö kelo ngut na tero dhanö i larë, abonge kobo ni kono angeo, ëntö cwer cwiny më lobo kelo thöo.

¹¹ Nën unu kite n'Obanga otio ki cwer cwinywu ködë! Nën kite na dong iketho unu ki cwinywu më nyutho ni ipe unu ki bal, i akëmöwu, i lworö, mitiwu më nënöna, i kite na un ilara unu ködë, ëka kite na un iyübërë ködë më miö pwod i kom gin na rac! Un dong ityeko nyuthere kenwu i yoo kibëc ni ba ingeo unu gin mörö i kom köp nön.

¹² Kadï bed acöö waraga bothwu, ba acöö pi ngat mörö n'onwongo ötimö gin na rac, onyo pi ngat mörö n'ëtimö gin na rac i kome, ëntö acöö ëk ömii kite na un idyërë ködë pïrwa onen ökö bothwu i nyim Obanga.

¹³ I kom köp ni kibëc ekweo cwinywa.

Möd i kom kweo cwinywa, wan ebedo ki yom cwiny më nënö kite na Tito onwongo tye ki yom cwiny ködë, piën un kibëc ikweo unu cwinye.

¹⁴ An onwongo awakara bothe pïrwu, ëka ba imia unu lewic. Ëntö kite na gin na kibëc na wan ekobo bothwu onwongo tye atir, cë dong wakërëwa pïrwu i nyim Tito tye atir.

¹⁵ Ëka mar mërë pïrwu ödökö na tük, ka ën opo kite na un ibedo ki winy i kome, kite na un igamö unu ën ködë ki lworö ëka ki myël kom.

¹⁶ An cwinya yom, piën atye ki gen i komwu.

8

Obanga marö ngat na miö müc

¹ Kobedini, utmegowa, wan ëmitö nî ibed unu kî ngec i kom kîca n'Obanga ömïö both jö n'oye Kiricito na tye i Macedonia.

² Gîn owok i atëmatëma na ger, ëka kî yom cwiny na gîn obedo gîni ködë i can na thwönë rwök n'ödiögî, ënë lönyö na dit më cwiny n'obedo gîni ködë më miö mïc.

³ Pïen gîn ömïö gin na gîn römö miö, ëka thon na kadhö. Gîn ötimö na ba ëdiögî adia.

⁴ Gîn ökwaöwa nakun bakö dhögî nî ëk enwong gîni karë më riberë ködwa më kënyö jö k'Obanga na leng.

⁵ Gîn otio tic n'ölöö genwa ökö, pïen gîn öcakö mîrë kën-gî both Rwoth ëka dong kî miti k'Obanga gîn öcakö mîrë gîni bothwa thon.

⁶ Pî manön wan dong ëcükö cwiny Tito nî kite na calö ën dong öcakö tic më kîca i kinwu, myero ën dong ocob ökö.

⁷ Ëntö kite na calö un ilöö dhanö i yodhi kibëc—i kom yee, i twakö köp, i ngec, i ketho cwinywu, ëka mar na un itye ködë i komwa—bër ilöö unu dhanö thon i tic më kîca më miö mïc.

⁸ Gîn na an atwakö ba obedo cîk na an ënë amiö, ëntö amitö nyutho bothwu kite na jö nökenë oketho gîni cwinygî, ëk atëm mar na un itye ködë ka obedo mar n'atir.

⁹ Pïen un ingeo cwiny më kîca na Rwoth Yecu Kiricito obedo ködë, kadî bed ën obedo alönyö, ëntö pîrwu ölökerë ödökö acan, ëk i can mërë ibed unu ëlönyö.

¹⁰ Ëka man ënë thama na an amiö i kom köp ni, twërö bedo na bër ka icobo unu gin na yam icakö i mwaka n'opoth ca. Yam un ënë ibedo unu jö

n'onwongo tye anyim, pathi tic kekën, ëntö naka thon më ketho cwinywu i miö mic.

¹¹ Kobedi dong amitö ni imëdërë unu ki ticwu anyim, ëk icob unu ökö. Bed unu ki miti më tyeko na röm aröma ki maca na yam icakö unu ködë nakun ikwanyö unu gin na mitërë ki i kom gin na tye bothwu.

¹² Obanga gamö mic na dhanö tye ködë ka cë ën tye ki miti më miö, na ba parö pi gin na ën ope ködë.

¹³ Wan ba etye ka kobo ni ëk jö nökenë obed gini na bër nakun ediöwu, ëntö ni ëk jö kibëc obed gini na röm aröma.

¹⁴ Kite na calö kobedini un itye ki jami na бүp, miü unu gin na gin mitö, ëk wang mörö ka gin thon bino bedo gini ki jami na бүp, gin thon bino miöwu gin n'orem ki bothwu, ëka dong bino miö un ibedo na röm aröma,

¹⁵ na calö ëcöö ni, "Ngat n'öcökö na бүp, ba tye ködë na pol, ëka ngat n'öcökö na nönök ba tye ködë na nönök."

Eoro Tito yo Korinti

¹⁶ An apwöyö Obanga n'oketho i cwiny Tito miti na thwönë na röm ki mëga më könyöwu.

¹⁷ En ba ögamö kwacwa kekën, ëntö oketho cwinye ië rwök, n'ömiö ën tye ka bino bothwu pi miti mërë kënë.

¹⁸ Wan eoro ën kanya acël k'ömünwa n'ëpakö rwök both jö n'oye Kiricito kibëc pi kite na ën titö ködë köp më Emuth na Bër.

¹⁹ Pathi manön kekën, ëntö jö n'oye Kiricito öyëro gini ën më woth kanya acël ködwa i tic më miö mic

më kica na wan etye ka tio pī miö dheo both Rwoth, ëka pī mitiwa më miö köny both dhanö.

²⁰ Wan etye n'ëgwökërë rwök ëk ngat mörö kür onwong bal mörö i kit na wan etye ka tic kī mīc na büp ni ködë.

²¹ Pī manön thamawa tye më tio gīn na bër, pathi i nyim Obanga kəkən, ëntö naka thon i nyim dhanö.

²² Wan thon etye ka orogi kanya acël k'ömīnwa nökenë na wan ebedo ka tēmö kite i yodhi kībēc, ëka wan enwongo nī ën obedo dhanö na ketho cwinye i kom tic na pol, ëntö i karë ni dong tye ka ketho cwinye na tək rwök na löö tic na yam cön, pī gen na thwönë na ën tye ködë i komwu.

²³ Ëntö pī Tito, ën obedo atic kanya acël köda ëka awodha i kinwu, ëka pī utmegowa, gīn obedo eor na cung pī jö n'oye Kiricito, ëka gīn ënë jö na kelo dheo both Kiricito.

²⁴ Pī manön, nyuth unu mar na un itye ködë both jö n'oye Kiricito, ëk gīn önën wakërëwa na wan etye ködë i komwu.

9

Mīc më könyö jö k'Obanga

¹ Kobedi dong ba mītërë an më cöönö bothwu köp i kom mīc n'ëmīö pī jö k'Obanga na leng.

² Piën an angeo miti na un itye ködë më miö köny, ëka an abedo ka wakara pīrwu rwök both jö më Macedonia, nakun akobo bothgī nī un jö na tye i Akaya onwongo iyübërë unu ökö cön më miö mīc anaka i mwaka n'opoth. Ketho cwinywu ömīö jö na pol thon oketho cwinygī i miö mīc.

³ Ēntö an atye ka oro utmego onu bothwu ěk wakĕrĕwa pĭrwu ĭkĕp ni kŭr ojik ĭkĕp kĕkĕn, ěk ibed unu nĭ yŭbĕrĕ ĭ kite na an akobo bothgĭ kĕdĕ.

⁴ Ka cĕ jŏ mĕkŏ mĕ Macedonia owotho kĕda ěka onwongo nĭ un ba ĭyŭbĕrĕ, wan ebino bedo kĭ lewic pĭ gen n'onwongo wan eketho ĭ komwu.

⁵ Pĭ manŏn an athamŏ nĭ bĕr aor utmego ni anyim ěk otyek gĭnĭ yŭb mĕ mĭc na un ĭcĭkĕrĕ mĕ mĭŏ, ěk obed n'ŏyŭbĕrĕ na calŏ mĭc na un ĭmĭŏ kĭ cwinywu kenwu na ba ědĭŏwu adĭa.

⁶ Kĕp tye nĭ kŏman, dhanŏ mŏrŏ na cwŏŏ kodhi na nŏnŏk, bino kaŏ thon na nŏnŏk, ěka dhanŏ mŏrŏ na cwŏŏ kodhi na bŭp, bino kaŏ thon na bŭp.

⁷ Dhanŏ acĕlacĕl myero ŏmĭi kite na cwinye omoko mĕ mĭŏ, abonge cwer cwiny onyo dĭc mŏrŏ, pĭĕn Obanga marŏ ngat na mĭŏ kĭ yom cwiny.

⁸ ěka Obanga twĕrŏ mĭŏwu gum mĕ jami na pol, ěk ĭ jami kĭbĕc ěka ĭ karĕ kĭbĕc ibed unu kĭ jami na rŏmŏwu na bĕr, na mĭŏ un thon ĭtwĕrŏ mĭŏ kŏny na thwŏnĕ mĕ kŏnyŏ tic kĭbĕc na bĕcŏ.

⁹ Kite n'ĕcŏŏ kĕdĕ ĭ Cŏc na Leng:

“Őmĭŏ jami mĕrĕ na pol both ĕcan,
kite atĭr mĕrĕ bedo naka naka.”

¹⁰ Ngat na mĭŏ kodhi both acwŏ kodhi ěka cem mĕ acama, bino thon mĭŏwu kodhi ěka mĕdŏ dĕrŏ mĕ kodhiwu cĕ bino nyanŏ kac mĕ kite atĭrwu mĕ mĭŏ mĭc.

¹¹ Ēn bino mĭŏwu ibedo ĕlŏnyŏ ĭ kit yodhi kĭbĕc ěk ibed unu jŏ na rŏmŏ bedo kĭ cwiny mĕ mĭŏ mĭc ĭ karĕ kĭbĕc, ěka ka wan etero mĭcwu both jŏ na mĭtŏ, gĭn bino pwŏyŏ Obanga.

¹² Tic më kõny ni na un itye ka tımö bino kelo gin na mütërë both jö k'Obanga na leng, ëntö pathi manön këkën, bino kelo thon pwöc na thwönë rwök both Obanga.

¹³ Piën gin na bër na ticwu kelo bino mïö jö na pol më mïö dheo both Obanga, piën nyutho winy na bër na un itye ködë i köp më Emuth na Bër i kom Kiricito ëka pi cwiny na bër na un ïnywakö ki limwu ködgi ëka ki jö kibëc.

¹⁴ Ëka i lëgagi pïrwu cwinygi bino parö pïrwu, piën pi kica k'Obanga na thwönë n'ökadhö karë na dong onen bothwu.

¹⁵ Pwöc obed both Obanga pi mic mërë na bër na ba kobere!

10

Pido ka Paulo pi tic mërë

¹ An, Paulo, akok bothwu nakun abakö dhöga, an n'ekobo ni amwol ëka dökï awör thon ka atye kanya acël kodwu, ëntö an abedo na ger ka atye thenge. Pi mwolo ëka dökï pi kica ka Kiricito,

² an akwaöwu ni ka an abino bothwu, kür imia unu abed ki gero ëka ki tæk cwiny na an ageno ni atwëro bedo ködë i kom jö mökö na thamö gini ni wan ëlübö kite më lobo ni.

³ Kadï bed ni wan etye i lobo, wan ba ëlwënyö ki jami lwëny më lobo ni.

⁴ Jami lwëny na onu ëlwënyö ködë ba obedo jami lwëny më lobo, ëntö obedo gini jami lwëny më tækö k'Obanga, na türö cël ka lang onu.

⁵ Wan ëtürö thama na ba tye atir, ëka awaka kibëc na tingere malö na mïö jii ba ngeo Obanga. Wan

ëmako thamagi më jem ëka ëmiö bedo ki winy i kom Kiricito.

⁶ Ëka kinge na dong idökö unu jö na tye ki winy n'örömö, cê wan ebino pwodo ngat acêlacêl na ba bino bedo ki winy.

⁷ Nën unu gin na tye i nyimwu. Ka dhanö mörö tye ki tøk cwiny ni ën ebedo dhanö ka Kiricito, myero ën önën dökü ni onu ebedo jö ka Kiricito kite na ën obedo ködë.

⁸ Piën kadî bed awakara rwök pi twërö na Rwoth ömiö bothwa, an ba abino bedo ki lewic më tic ki twëröna. Twërö nön ën ömiö bothwa më könyöwu, ëka më döngöwu ëntö pathi më dwököwu piny.

⁹ An ba amitö ni abed calö ngat mörö na tye ka miö lworö bothwu ki waraga na an acöögî.

¹⁰ Piën jö mökö kobo ni, “Waraga mërë pøk ëka tøk, ëntö ka ën othuno bothwu kome bedo na görü, ëka thon gin mörö ope i köp mërë na ën twakö.”

¹¹ Jö n'obedo ni kömanön myero öniang gini ni kite na wan ëtwak ködë i waragawa ka wan epe, wan ebino timö ni kömanön thon ka etye bothwu.

¹² Wan ba ëparö më kethere kënwa onyo më pore ki jö mökö na pakërë gini kën-gi. Ëntö ka gin opimere kën-gi ëka opore gini kën-gi, nwongo gin ba ryäk.

¹³ Wan ba ebino wakërë n'ökadhö wangë n'ëmïö, ëntö wan ebino wakërë kanya Obanga opoko niwa më tic, më thuno naka thon bothwu.

¹⁴ Wan ba ebino kadhö kanya myero ejik ië calö yam ba ethuno bothwu, piën wan ënë ëcakö thuno bothwu më titö köp më Emuth na Bër i kom Kiricito.

¹⁵ Wan ba ëwakërë n'ökadhö wangë n'ëmïöwa i kom tic na jö nökenë ënë oyelere ië, ëntö wan etye ki gen ni ka yeewu ömëdërë, ticwa thon bino mëdërë rwök i kinwu, nakun lübö kanya yam epoko nïwa.

¹⁶ Cë wan ëtwërö titö Emuth na Bër i lobo na tye kanya bor. Piën wan ba ëmitö wakërë ki tic na dong ngat nökenë ötimö i kakar tic ka dhanö nökenë.

¹⁷ Ëntö ngat na wakërë myero öwakërë i Rwoth.

¹⁸ Piën pathi ngat na pakërë kënë ënë Obanga pwöyö, ëntö dhanö na Rwoth pakö.

11

Paulo ëka ëkwëna na twot

¹ Athamö ni idii unu cwinywu na nönök i koma pi mingona. Dii unu cwinywu köda.

² An abedo ki nyeko i komwu ki koth nyeko n'Obanga tye ködë. Piën an acikara më miöwu both ëcwö acël na ënë Kiricito ëk amiiwu bothe na calö nyakö na leng na bara ongeö ëcwö.

³ Ëntö an atye ki lworö ni kite na calö thwol yam öbwölö Eba k'ököra mërë, un thon jii bino balö thamawu ökö, ëka bino miöwu ba ibino marö unu Kiricito ki cwinywu kibëc na leng.

⁴ Piën ka ngat mörö obino bothwu cë ötitö Yecu nökenë na path ki Yecu na wan ëtitö, onyo ka igamö unu tipo na path ki kom maca na un igamö, onyo Emuth na Bër na path ki kom maca na un iyeo, manön un iyeo më tic ködë.

⁵ Ëntö an ba athamö ni an atidi both “ëkwëna na dito.”

⁶ Kadī bed nī an ba aryëk ī twak, ëntö an atye kī ngec. Wan enyutho bothwu köp ni kanyalër ī yodhi kibëc.

⁷ Onyo an onwongo atimö bal ī karë na an amwolarä ëk etingwu malö, piën an atitö bothwu köp më Emuth na Bër k'Obanga abonge cül mörö?

⁸ An ayakö jö n'oye Kiricito nökenë nakun agamö cül kī bothgi ëk atii niwu tic.

⁹ Eka ī karë na an onwongo atye kodwu na mitö gin mörö, an onwongo ba abedo pëkö both ngat mörö, piën utmego n'obino gini kī ī Macedonia ömïö ngö n'onwongo an amitö. An agwökara kür abed pëkö bothwu ī yoo mörö këkën, ëka abino mëdara më timö nī kömanön.

¹⁰ Na calö köp n'adyer ka Kiricito tye ī cwinya, ngat mörö ope na bino jükö awakana kī ī lobo Akaya.

¹¹ Pingö? Piën an ba amaröwu? Obanga ngeo nī an amaröwu!

¹² Eka an abino mëdara më timö ngö na an atye ka timö, ëk kür amii jö na mitö nwongo karë më miögi bedo na röm aröma ködwa ī tic na gin wakërë ië.

¹³ Piën koth jö nön obedo gini ëkwëna na twot, etic na bwölö jii, na lökërë gini calö ëkwëna ka Kiricito.

¹⁴ Ngat mörö myero kür obed kī ur ī köp ni, piën kadī Catan kikome thon lökërë na calö malaika na mënyö piny.

¹⁵ Pi manön man ba obedo gin mörö më aura ka cë etic ka Catan lökërë gini calö etic na kitegi atir. Ajikigi bino bedo na röm aröma kī tic na gin otio.

Can ka Paulo na calö akwëna

¹⁶ An akobo dökī nī ngat mörö kür ötham nī an abedo aming. Ëntö ka ithamö unu nī kömanön, cë ijöla unu na calö dhanö na mning, ëk ömïa thon awakara na nönök.

¹⁷ Gin na an atye ka kobo k'awaka ba obedo gin na Rwoth ömïa nī akob bothwu ëntö an atwak calö aming.

¹⁸ Kite na jö na pol wakërë i kite na lobo wakërë ködë, an thon abino wakara.

¹⁹ Un idiö cwinywu kī yom cwiny kī jö na mning, nakun un ibedo jö na ryëk!

²⁰ Adyer un idiö cwinywu kadī ngat mörö tye ka lököwu më bedo opii mërë, onyo tye ka camö limwu, onyo buowu, onyo na bwönöwu, onyo bapö lemwu.

²¹ Kī lewic na mëga an ayeo nī wan onwongo ëgörü rwök pī köp nön!

Ëntö gin mörö na dhanö diö cwinye ië më wakërë pirë, an atye ka twak na calö aming, an thon adiö cwinya më wakara i kom gin nön.

²² Gīn obedo jö Iburu? Cë an thon abedo. Gīn obedo jö Icarael? Cë an thon abedo. Gīn obedo ëkwaë k'Abraam? Cë an thon abedo.

²³ Gīn obedo etic ka Kiricito? (An atwak na calö ngat n'opo.) An alöögī, atio tic na thwönë rwök, abedo i buc wang na pol, epwoda kī wel lüth na ba kwanërë, ëka abüc kī i thöo wang na pol.

²⁴ Eyuda opwoda gīnī wang abic kī del wang pyer adek wie abungwën.

²⁵ Opwoda gīnī wang adek kī lüth, ecela kī kite wang acël, mel ötür köda wang adek, abuto i nam kiwor ëka kiceng.

²⁶ An abedo ka woth pī karë na pol. Anwongo

can n'öya kî i kulo na möl ëka can n'öya kî both ëyak. Anwongo can n'öya kî both jö më thurwa kikokome ëka can n'öya kî both Erok. Anwongo can n'öya kî i pacö na dit, can n'öya kî i thim, can n'öya kî i nam. Anwongo can n'öya kî both utmego n'obedo etwodo.

²⁷ An atio tic na tøk rwök pî karë na lac na ba aninö kiwor. An ario kec k'örö pii, na ba acamö gin mörö. Adangö thon piny na ngic abonge gin mörö më aruka.

²⁸ Mëd i kom gin nökenë kibëc, tye gin acël na kelo pëkö botha karë kî karë, ënë par na an atye ködë pî jö n'oye Kiricito kibëc na tye i kabedo na papath.

²⁹ Nga na tye kî görü ëka an ba awinyo görü? Nga n'ëmïö opodho i bal na ia ba öwang ië?

³⁰ Ka onwongo myero awakara, an abino wakara pî gin na nyutho görüna.

³¹ Obanga ëka Apap ka Rwoth Yecu, na myero ëpak naka naka, ngeo nî an ba atwot.

³² I karë na an atye i Damaciko, gabuna na tye i thë löc ka rwoth Areta onwongo obedo ka kürö pacö ka jö Damaciko nî ëk ëmaka,

³³ ëntö ëmïa adönyö yökö n'elwa piny k'adita nakun awok kî i wang derica na tye i kom cël, ëka alüü ökö kî i cingë.

12

Lek ka Paulo ëka öküdhö na tye i ringo kome

¹ An myero amëdara më wakara. Kadï bed nî gin mörö ope n'enwongo kî ië. An abino mëdara më twak i kom gin na an anënö i wang lek ëka gin na Rwoth onyutho botha.

² An angeo dhanö na tye i Kiricito na dong ökadhö mwaka apar wie angwën na yam etingo etero ökö malö i wi polo më adek. Kadî bed ni onwongo tye i kom onyo ba tye i kom, an ba angeo ëntö Obanga ënë ngeo.

³ Ëka an angeo ni dhanö ni kadî bed tye i kom onyo ba tye i kom, an ba angeo ëntö Obanga ënë ngeo,

⁴ onwongo etingo etero malö i polo. Ën onwongo owinyo köp na ba römö atwaka, na ba eyeo dhanö më kobo.

⁵ An abino wakara pi koth dhanö na cal ki manön, ëntö ba abino wakara pira këna, na path ki görüna.

⁶ Kadî bed an amitö yërö më wakara, an ba abino bedo aming, piën nwongo an abino twakö köp n'atir. Ëntö an ba abino wakara ëk dhanö mörö kür obed ki thama i koma na löö gin na ën önönö onyo köp na ën owinyo awinya ki botha.

⁷ Më gwököna ëk kür atingara malö këna pi jami më aura na pol na yam Obanga onyutho botha, yam eketho öküdhö i ringo koma, aor ka Catan ëk oketh can i koma ëk kür atingara malö këna.

⁸ Wang adek an akwaö Rwoth ëk ökwany ökö ki botha.

⁹ Ëntö ën okobo nina ni, “Kicana tye na romi, piën tüköna bedo na tük rwök kanya görü tye ië.” Pi manön an abino wakara rwök ki yom cwiny i kom görüna, ëk tükö ka Kiricito obed i koma.

¹⁰ Pi Kiricito ömïö cwinya yom pi görü na papath na an atye ködë, ayeny, can, pëkö mökö n'eyela ködë, pëkö na dia rwök, piën kanya an agörü ki ië, ënë kanya an atëk ki ië.

Mar ka Paulo pī jō n'oye Kiricito na tye i Korinti

¹¹ An onwongo abedo aming! İdia unu ië, piën un onwongo myero ipaka unu. An ba atidi both “Ekwëna na dito” kadï bed an ba abedo gin mörö.

¹² Gin na kibëc na nyutho ni an abedo akwëna kikome otimëre yam i kinwu ki diö cwiny na thwönë, anyuth mökö, gin më aura, ëka tango.

¹³ Gin acël këkën na an ba atimö, na an atimö both jō n'oye Kiricito nökö, an kikoma onwongo ba abedo pëkö bothwu. Tim nina unu kica i bal ni.

¹⁴ Kobedini dong an ayübara më bino bothwu wang më adek, ëka an ba abino bedo pëkö bothwu, piën gin na an amitö ba obedo jamiwu ëntö un. Ka obedo ni kömanön, ëthinö kür myero ökan jami pi enyodogï ëntö enyodo ënë myero ökan jami pi ëthinögi.

¹⁵ An abino bedo ki yom cwiny rwök më tic ki jami kibëc na an atye ködë, kadï tüköna kibëc pi könyö kwö më tipowu. Ka an amaröwu rwök, un ibino maröna na nökö?

¹⁶ Entö kadï bed ni kömanön, an ba abedo pëkö bothwu. Cë kite na an onwongo abedo ököra, an abino amaköwu ki bwöl.

¹⁷ Tye ngat mörö ki i kin jō n'onwongo an aorogï bothwu n'obuo gin mörö ki bothwu pira?

¹⁸ An akwaö Tito ni myero obin bothwu ëka aoro ömîn onu më woth ködë kanya acël. Tito obino obuowu? Pe! Onu yam ba etio tic ki cwiny acël ëka ëlübö yoo acël këkën?

¹⁹ Un ibedo thamö pi karë kibëc ni wan ebodo ka pido pirwa këwa i nyimwu? Wan ebodo twak i nyim Obanga na calö jō na tye i Kiricito, ëka jami

kībēc na wan ëtimö, utmegona më amara, obedo më jingöwu.

²⁰ Piën an atye ki lworö ni caa nökenë ka an athuno atwëro nwongowu ipath ki kite na an amitö ni ibed unu ködë, ëka un thon doki ibino nwongo unu ni an apath ki kite na un imitö ni an abed ködë. An atye ki lworö ni gwök onyo itye unu ki dha, adinga, akëmö, woro, ayeny, anii, awaka ëka arubaruba.

²¹ An atye ki lworö ni ka adwogo bothwu doki, Obangana bino miona amwolara i nyimwu, ëka an abino kok pi jo na pol n'öbalö cön cë ba ongut gini ki i kom timgi na ba bër, tim më ölyang ëka miti më kom na gin ötimö.

13

Limo ka Paulo më adekyo Korinti

¹ Man ënë wang më adek na an atye ka bino ködë yo bothwu. “Caden na römö ariö onyo adek ënë myero omok gini köp kībēc n'ekelo më alara.”

² An onwongo dong akobo niwu ökö cön i karë na an onwongo atye bothwu i limona më ariö. Kobedi dong anwö na an ape bothwu ni ka adwogo doki, ba abino timö kica both jo n'öbalö cön,

³ kite na un imitö moko ni Kiricito twak nakun wok ki botha. En ba obedo ngat na görü më tic kodwu ëntö ën tük i kinwu.

⁴ En onwongo eguro i kor yath aria piën en onwongo ope ki tükö, ëntö kobedini en tye na kwö pi tükö k'Obanga. Kadi onu thon egörü i en, ëntö i ticwa kodwu onu ebino kwö kanya acël ki Kiricito pi tükö k'Obanga.

⁵ Ngirë unu kenwu, ëk inën unu ka cë icung unu na tək i yeewu. Tëmërë unu kenwu. Un ba itye ka nīang nī Yecu Kiricito tye i iwu? Thwara ka ibedo unu jō n'Obanga ba pwōyō.

⁶ An ageno nī un ibino nīang na bër nī wan ba ebedo jō na ba ëpwōyōgī.

⁷ Wan ëlëgō Obanga pīrwu ëk kūr itīm unu gin mörö na rac. Pathī më nyutho nī wan jō n'Obanga pwōyō, ëntö wan ëmītö nī un itīm gin na bër, kadi bed nī wan enen calö jō na ën ba öpwōyō.

⁸ Pīën wan ba ëtwërö tio gin mörö na ba rwatërë kī köp na tye atir, ëntö ëtwërö tio gin na rwatërë kī gin na tye atir kəkën.

⁹ Cwinywa yom ka wan ëgörü, nwongo un itək, dökī wan ëlëgō nī idök unu jō n'otengo.

¹⁰ Man ënë gin n'ömīö an acöö köp ni na an pod atye kanya abor kodwu, ëk kūr abed na ger i komwu ka an abino nakun atio kī twërö na yam Rwoth ömīa ëk akönywu më döngö, ëntö pathī më dwököwu pīny.

Moth ka Paulo më ajiki

¹¹ Më ajiki, utmegona, bed unu dong. Yüb unu dong kitewu na bër, ëka dökī myero iwiny unu kokona pī gin na an akwaöwu pīrë. Bed unu kī thama acël, bed unu kī kuc, ëka Obanga na won mar kī kuc bino bedo kodwu.

¹² Mothere unu kenwu kī moth më mar.

¹³ Jō k'Obanga na leng kibëc omothowu.

¹⁴ Kīca ka Rwothwa Yecu Kiricito, mar k'Obanga, ëka kī riberë ka Tipo Naleng obed kodwu kibëc.

xxx

Leb-Thur

Thur: Leb-Thur (New Testament+) for Uganda

copyright © 2024 Wycliffe Bible Translators, Inc.

Language: (Thur)

Translation by: SIL Uganda

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-10

PDF generated using Haiola and XeLaTeX on 10 May 2025 from source files dated 10 May 2025

61e7f4da-dc0f-50a1-9dae-64ee1b392d80